

FORUM

Bun di, bun de, bien di, bün gi ed allegra, Anne-Louise

Grazia fitg per tes salid en tia columna dals 14 d'avrigl 2022. Jau ma legr che ti dastgas ir ad eleger ils 15 da matg 2022. Quai has ti merità. La finala has ti fatg tut ils sforzs per survegnir il dretg da burgaisa. Jau hai gi pli simpel, cunquai che hai jau il privilegi d'esser naschi en il Grischun sco uffant da geniturs svizzers. Schegea – dal tutfatg na constat quai er betg, perquai che mo mes bab era Svizzer. Mia mamma era Taliana ed è daventada Svizra pir tras la maridaglia cun mes bab. Ti vesas: esser Svizra u Svizzer è mintgatant cumplitgà – er sch'ins na discorra, sco jau, betg rumantsch ed er sche l'examen da troccas na fa betg part dal test da naturalisaziun. Schegea – per persunas che vulan daventar Svizras e Svizzers fasschessan las reglas da troccas e la lingua rumantscha, tut tenor la situaziun, dapli senn che la savida davart Guglielm Tell e davart ils flums svizzers e la dumonda, quantas chartas da gieù (inclusiv il nar) ch'i duvrass per represchentar l'entir Cussegl federal.

Forsa es ti surstada dal fatg che var in quart da la populaziun svizra n'ha insomma gnanc il dretg da burgais svizzer. Pia 2 milliuns persunas che vivan, lavuran e pajan taglia qua, na dastgan betg sa participar a las decisziuns – ni cun ni senza examen da troccas. Tgi sa, sche quai è correct u bun uschia? Almain ma maina quai a tia dumonda, co che ti chattas per tai las dretgas persunas or dal ravugl d'ina dunna e da sis umens per ils 15 da matg 2022, e tge glista che ti pos metter en l'urna en tes circl electoral per far valair cumplainmain tia vusch – per exempel sche ti prendas serius las sfidas da la midada dal clima ubain sche ti vuls sustegnair in bun provediment da la sanadad u ina procedura da naturalisaziun pli simpla.

Er sche jau sez na dun betg troccas, sai jau che las atgnas chartas pon vegnir circumschrittas raffinadamain en quest gieù per communitgar ina intenziun a la congiugadra u al congiugader. En mintga cas – per las elecziuns da la Regenza ta poss jau dir: «Jeu sun cheu.» E sche ti prendas il bloc cun las glistas per il Cussegl grond, alura è la glista 1 in «tschéc da Medel». Sco ch'i saja, ina instrucziun solida per eleger chattas ti sut gr.ch en il dossier «Nov sistem electoral». E sco tar las troccas na po betg mintgina e mintgin gudagnar, ma quai che quinta è la partecipaziun!

Cun cordials salids, Peter

(Remartga redacziunala: Il cusseglier guvernativ Peter Peyer sa referescha a la columna dad Anne-Louise Joël, cumparida ils 14 d'avrigl en La Quotidiana.)

PLED SIN VIA

Ina teila cun la DNA da Cristus

FLURINA CAVEGN-TOMASCHETT

La dumengia sunter la fiasta da Pastgas retscheivan biars affons da confessiun catolica l'emprema ga la s. communiun. Quella tradiziun deriva digl'emprema temps dils cristians. Els vegnevan battegiati la notg da Pastgas e targevan en quei di in vestgiu alv. Quel purtavavan els duront in'entira jamna. Lu astgavan els passar l'emprema ga agl altar e retscheiver il paun dalla veta. Cun quella caschun mettevan els puspei giu il vestgiu alv. Il vestgiu alv ei aunc restaus per quei di da fiasta dils premcommunicants. Ord quei motiv vegn il di savens era numnaus Dumengialva.

E puspei eis ella cheu, la teila alva che ha accumpignau mes patratgs sur tut ils dis da fiasta. Curdada en egl era ella a mi enten leger igl evangeli da Pastgas. Jeu maneghel cheu la teila alva, il lenziel, che schischeva giun plaun en la fossa vita. Il lenziel, el qual Jesus era vegnius zugliaus per metter en fossa. La teila era ussa danvonz. Mo mei veva ella enzaco pigliau.

E tuttenina vesel jeu en quei toc teila e autras teilas che vevan giugau ina rolla ils davos dis dalla veta da Jesus. P.ex. la teila che Jesus veva duvrau la sera dalla Sontga Tscheina per schigentar ils peis a sias giuvnals ed a ses giuvnals.

Ni la teila da Veronica, la dunna curuschusa che steva alla via dalla crusch. Ella veva tunschiu la teila a Jesus

per schubergiar giu il suadetsch, sias larmas e siu saung.

La teila ha denton era mussau a mi il vestgiu da Jesus che la schuldada veva scarpau naven dad el e repartiù denter els.

Ed jeu hai sentiu: Quella teila era dapli che mo la teila per enzugiar il defunct Jesus. Ella cunteneva sia DNA. Ella cunteneva siu survetsch al proxim, sias larmas, siu saung, siu pitir. Denton leu, en la fossa, mussava ella vi sin la levada. La teila dil pitir e dalla mort era daventada ina teila dalla veta!

«La teila cunteneva siu survetsch al proxim, sias larmas, siu saung, siu pitir.»

Mo cun la DNA da Cristus maneghel jeu buca sia ierta genetic-biologica, mobein quella dalla cardientscha. Quella, che Jesus ei buca restaus en la mort, mobein ch'el ei levas alla veta. E che exact quei stat era avon a nus cristianas e cristians che targein en cun il batten il vestgiu da Cristus. Schidadir in vestgiu cusius ord ils lenzeuls da Jesus. Quei ei era il vestgiu dils affons che retscheivan quels dis l'emprema ga la s. communiun, il vestgiu da Dumengialva. Jeu giavischel ad els ed a nus cristians da tuttas confessiuns, che nus purteien cun plascher e perschasiun nies vestgiu cun la DNA da Cristus.

Flurina Cavegn-Tomaschett da Breil è teologa ed assistenta pastorala. En collavuraziun cun RTR publitgescha la FMR adina en la davosa ediziun da gasetta da l'emna il «Pled sin via». Quel è alura era d'udir mintgamai la dumengia tar RTR, en l'emissiu «Vita e cretta».

Voss «orizonts»

La Quotidiana porscha ina pagina cun ils «Orizonts», la quala dat spazi a contribuziuns era da lecturas e lecturs. Sin ils «Orizonts» duain avair plazza brevs, opiniuns, artitgels da forum, necrologs, fotografias commentadas, gratulaziuns etc.

Las contribuziuns ston esser signadas cun num da l'autur. I vegnan publitgadas mo contribuziuns scrites en lingua rumantscha e talas che sa tegnan vi da simpels principis da la buna maniera. Las contribuziuns na vegnan betg indemnissadas cun in onurari. La redacziun FMR selectescha, curregia e redigia tenor basegn e las impaginescha sin ils «Orizonts» da La Quotidiana.

Vossas contribuziuns pudais trametter a la redacziun FMR: redacziun@fmr.ch

FORUM

Allianza dil Center Grischun - Gliesta 5

Ina consequenza dil niev sistem d'eleger il Cussegl grond, che dat en egl, ei il grond diember da varga 400 candidatas e candidats. Da niev decidan tut las vuschs che mintga partida obtegn el cantun. Ellas fuorman la basa da repartiziun dils 120 mandats el Cussegl grond. La persuna che candidescha sto gnanc haver seriusas schanzas da vegnir elegida. Ella sto era buca habitar el cumin nua ch'ella candidescha ni stada engaschada en vischnaunca. Tuttina quenta mintga vusch da partida che quella persuna survegn.

La finamira da nossa partida l'Allianza dil Center Grischun ei da rinforzar la politica

dil center sin scalem communal e cantunal. Nossa partida stat en per ina societad libera e humanistica. Per tuttas Grischunas e Grischuns vul l'Allianza dil Center crear las meglieras cundiziuns da basa per viver e saver luvrar en nossas regiuns.

Nos candidats pil Cussegl grond dall'Allianza dil Center Cadi – Clemens Berther, Fabian Collenberg, Diego Deplazes, René Epp e Maurus Tomaschett, e nossa candidata e candidats per la Regenza – Marcus Caduff, Carmelia Maissen e Jon Domenic Parolini, s'engaschan per tut quellas valurs. Ellas ed els vivan e s'engaschan en nossas vischnauncas.

Las tendenzas radicalas en societad e politica prendan displascheivlamein tier. Il cuntrari pren la motivaziun da tscherchar soluziuns comunablas giu. Gest en quei temps ei in ferm center politic ton pli impurtonts.

Per quei mei a votar, segies consequents. Mirei che l'Allianza dil Center salvi sia forza el Cussegl grond ed ella Regenza. Jeu voteschel per nossa candidata e nos candidats per la Regenza e mettel ell'urna la gliesta 5 da nossa partida per las elecziuns dils 15 da matg 2022.

Placi Berther, Camischolas/Sedrun



Buns cunfinns – buns vischins! Duas chasas amez la Val Stussavgia.

FOTO DAVID TRUTTMANN



Cura che jeu mierel, plantei in roser. In roser cun stagnas rosas melnas, che glischan grevas sco la brama, sin la fossa mia.

tenor Gian Fontana

Giusep Tschuor

10-7-1940 – 19-4-2022

Miu car um e nies bab, tat, frar ed aug ei nunspitgadamein sedisgraziatus enten far brin sin sia carezada acla sur Trun. Trests e consterni mo engrazieivels prendein nus cumiau.

Adressa da malencurada: Anna Tschuor Via da Laax 12 7152 Sagogn

Anna Tschuor-Holderegger Silvia Tschuor cun Uolf Candrian Donat Tschuor Ladina Tschuor cun Viola Ursula Tschuor Agnes e Bruno Wolf-Tschuor parents, figliols e figliolas, convischins ed amitgs

La sepultura ha liug gliendisgis, ils 25 d'avrel 2022 allas 14.00 ella baselgia catolica Sagogn. L'urna vegn tschentada si en baselgia per saver prender cumiau naven dallas 13.00.

Enstagl da fluras supplichein nus per donaziuns a favur dall'organisaziun Ukraine Hilfe Graubünden. IBAN CH97 0077 4010 4398 2130 0. Remarca: Donaziun Giusep Tschuor